

**Ukiuortoortumik akileraartarnermut allagartamut nassiussinermi ilanngussatut akileraarutit procentinngorlugit kommuneni Namminersorlutillu Oqartussat ataani susassaqaqfinnut sorlernut tamakkiisumik aningaasartuutit procentinngorlugit takussutissaqalernissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.**  
(Inatsisartunut ilaasorta q Aqqalu C. Jerimiassen, Atassut)

### **Akissuteqaat**

(Aningaasaqarnermut, Aatsitassanut, Inatsisit atuutsinnerannut Naligiissitaanermullu Naalakkersuisoq)

### **Siullermeerinnineq**

Aallaqqaasiullugu siunnersuuteqartoq aqutsinermi ersarissuutitsinissaq qitiutillugu qulakkeerinninniartumik siunnersuuteqarneranik qutsaviginiarpara.

Siunnersuummi innuttaasut ataasiakkaat akileraarutaasa sumut atorneqarnerannik paasisutissanik ajornannginnerulersitsinissamik siunertarineqarpoq. Siunnersuutip siunertaa isumaalu Naalakkersuisut tamakkiisumik qujaniutigaat.

Siunnersuutilli piviusunngortinneqarnerani akimmiffinnik arlalinnik Naalakkersuisut tikkuagassaqaqarput.

Siunnersuutigineqartutulli pisariitsigisumik akileraartartut kommunini akiliutaasa atugassatut tamakkerlugit malinnaaffiginissaat pisinnaangilaq. Tamanna ingerlatsineramik pisariitsumik sunnuteqarluartumillu pigisaqaannarnissamut pissuteqarpoq, akileraarutinit akitsuutinillu isertitat karsimut ataatsimoorunneqartumut toqqaannartumik nakkartinneqartarmata. Namminersorlutik Oqartussat kommunillu ullumikkut aningaasartuuteqaraangata isertitat suminngaaneereri apeqqutaaneq ajorpoq.

Isertitalli ataatsimoorut suminngaaneersuunerat oqaatigineqarsinnaasarpoq. Taamatullu aamma aningaasartuutit tamarmiutillugit. Namminersorlutik Oqartussanut kommuninullu ataasiakkaanut. Naak taamaaliorneq paasisutissiinertut issinnaagaluartoq, paasisutissat pingaarnersiugaassapput, innuttaasumullu annikitsuaqqamik iluaqutaassallutik. Skattekortinik nassiussisarnerup pisarnerata aamma Namminersorlutik Oqartussat kommunillu aningaasaqarnerat pillugu kisitsisinik nutaanik ilanngussinissaq ajornakusoortippaa. Taamaalilluni kisitsit siornarnisat nassiunneqartassapput.

Pisortat aningaasartuutaasa kommunini Namminersorlutillu Oqartussani taakku nittartakkakut quppernerisigut innuttaasunit sukkulluunniit pissarsiarineqarsinnaareernerat, siunnersuuteqartup oqaatigaa.

Aamma eqqarsaatigineqarsinnaavoq paasisutissat skattekortimiitinneqassanersut, tassami tamanna innuttaasunut paatsuungatitsineramik kinguneqarsinnaammat. Kisitsisit nalunaarutigineqartut innuttaasumut ataatsimut akileraarusiinermit toqqaannartumik attuumassuteqarnaviangillat, taamaalillunilu skattekorti marlunnik imminnut attuumassuteqanngitsunut attuumassuseqalissaaq.

Ataatsimut isigalugu siunnersuummik piviusunngortitsineq siunnersuuteqartup sunniutissatut neriuutigisaatut inerneqarnissaa Naalackersuisut qularaat.

Siunnersuut pappiaqqanik aniatitsinernut nassiussinernullu aningaasartuuteqarnerulersitsissasoq ilimanarsinnaavoq. Aamma atortussat elektroniskinnngorlugit nassiussuunnerinut annertunngitsumik aningaasartuuteqarnerusoqarsinnaavoq. Taassuma qaavatigut paasissutissanik suliarinninnermut, taakkuninngalu paasiuminartumik saqqummiinissamut aningaasartuutissanik immikkoortitsisoqartariaqassaaq. Siunnersuut piffissami aningaasanut inatsisiliorfiusumi ukiuni sisamani 1,3 mio. kr.-nik nalilinnik, ukiumut aningaasartuutinik 350.000 kr.-nik nassataqarnissaa Naalackersuisut missingerpaat. Aningaasartuutit taakku Akileraartarnermut Aqutsisoqarfimmit matussuserneqartariaqassapput, taakkullu siunertamut uunga aningaasaliissutitigut matussutissaqanngillat.

Tamanna tunngavigalugu Naalackersuisut siunnersuut itigartinneqassasoq innersuussutigaat.

Naalackersuisulli aamma 2022-mut Aningaasaqarnikkut ingerlatsineq pillugu nalunaarusiassami, siunnersuuteqartup pingaarnertut anguniagaa piviusunngortinniarlugu paasissutissat pisariaqartut ilanngunneqarnissai isumaliutigerusuppaat.